

**Lárionad na Gaeilge: Taighde, Teagasc agus Tástáil
Ollscoil Mhá Nuad**



An tSeirbhís um Cheapacháin Phoiblí

Meánleibhéal 2 (B2)

Scríbhneoireacht agus Úsáid na Gaeilge: Treoir



Eolas ginearálta

- Beidh an scrúdú speisialta seo ar siúl ar dháta agus in ionad a bheartaíonn an tSeirbhís Um Cheapacháin Phoiblí.
- Níl cead ag iarrthóirí aon fhoclóir a bheith acu le linn an scrúdaithe.
- Mairfidh an Scrúdú Scríbhneoireachta agus Úsáid na Gaeilge 90 nóiméad ar fad.
- Tá sé tábhachtach go mbeadh iarrthóirí ar an eolas faoin leagan amach atá ar an scrúdú agus na cineálacha ceisteanna a bhíonn sa rannóg seo.
- Moltar do na hiarrthóirí cúram faoi leith a dhéanamh de chaighdeán na lámhscríbhneoireachta.

Seo thíos léiriú gearr ar na rudaí is féidir le foghlaimeoirí a bhfuil Meánleibhéal 2 (B2) bainte amach acu a dhéanamh sa scríbhneoireacht.

Scríbhneoireacht

Ba cheart go mbeadh foghlaimeoirí ag Meánleibhéal 2(B2) in ann tabhairt faoi réimse measartha leathan de théacsanna scríofa a chur ar fáil, fad is a bhaineann an t-ábhar le topaicí sothuartha. Beidh a fhios ag na foghlaimeoirí conas litir fhoirmeálta nó neamhfhoirmeálta a scríobh; an chaoi le tús agus deireadh a chur le litir, an seoladh, dátaí, poncaíocht agus araile. Níor cheart go mbeadh aon mhíchruinneas substainteach ann fad is a bhíonn an t-ábhar féin réasúnta simplí, sothuartha. Beidh smacht maith ag na foghlaimeoirí ar an ghramadach. Ní dhéanfaid siad botúin ghramadaí a chruthódh míthuiscint thromchúiseach. Bainfidh siad úsáid as foclóir leathan a chuimsíonn formhór na dtopaicí ginearálta agus ábhair faoi leith ar spéis leo féin iad. Beidh siad réasúnta cruinn maidir le litriú agus poncaíocht ach is dócha go mbeidh tionchar na máthairtheanga le brath ar a gcuid scríbhneoireachta.

Tá ceithre cheist ar fad sa rannóg seo agus caithfidh na hiarrthóirí tabhairt faoi gach ceist.

Ceist	Líon míreanna	Cineál téacs	Formáid na bhfreagraí	Líon marcanna	Fócas an scrúdaithe
1	1	Litir fhoirmeálta (iarratas ar phost nó áit ar chúrsa, ag cur isteach ar chomórtas srl.)	Scríbhneoireacht threoraithe	30	Cruinneas gramadaí agus struchtúrtha, comhleanúnachas téacs.
2	1	Alt, léirmheas, scéal, aiste.	Oscailte	30	Cruinneas gramadaí agus struchtúrtha, comhleanúnachas téacs.

3	15	Alt i nuachtán nó iris ar líne, blag.	Eagarthóireacht ar théacs	30	Cruinneas gramadaí agus struchtúrtha.
4	6	Abairtí i mBéarla	Gaeilge le cur ar na habairtí sin	30	Cruinneas gramadaí agus struchtúrtha

Eolas breise

Ceist 1

- Beidh ar na hiarrthóirí litir, nóta, teachtaireacht, teachtaireacht ríomhphoist a léamh agus ceisteanna a chuirtear ann nó eolas a lorgáitear a thabhairt san fhreagra a scríobhann siad.
- Cuirfear pointí treorach ar fáil do na hiarrthóirí agus caithfidh siad na pointí go léir a chlúdach sna freagraí a scríobhann siad.
- **Ba cheart do na hiarrthóirí a réimse cumais sa teanga a léiriú.** Ní leor liosta ceisteanna nó sraith ráiteas. Ba cheart go mbeidís in ann forbairt a dhéanamh ar na heochairfhocail sa cheist gan píosaí fada a thógáil ón bhuntéacs.
- Ba cheart do na hiarrthóirí timpeall **focal 160-180** a scríobh don cheist seo.

Ceist 2

- Beidh ar na hiarrthóirí litir, léirmheas, cur síos, scéal, alt nó aiste a scríobh.
- Níl eolas faoi leith ná saineolas faoin ábhar ag teastáil.
- Ba cheart do na hiarrthóirí timpeall **160-180 focal** a scríobh ar na leathanaigh sa leabhrán.
- Cuirfear eolas ar fáil faoi chuspóir an téacs agus tabharfar leid faoin lucht léitheoireachta ar a bhfuil sé dírithe.

Ceist 3

- Beidh eagarthóireacht le déanamh ag na hiarrthóirí ar shliocht nó dhó.
- Beidh orthu **15 bhotún** ar fad a aimsiú agus a cheartú.
- Beidh níos mó ná botún amháin ar chuid de na línte.
- Baineann na botúin le gramadach agus litriú na Gaeilge.
- Ba cheart do na hiarrthóirí uimhir na líne a scríobh, an focal/na focail atá mícheart, agus ansin an leagan ceartaithe. Mar shampla:

<i>Uimhir na líne</i>	<i>An leagan mícheart</i>	<i>An leagan ceartaithe</i>
1	fhill	d'fhill

Ceist 4

- Beidh ar iarrthóirí 6 cinn d'abairtí gearra a aistriú.
- Beidh orthu aird faoi leith a thabhairt ar an ghramadach agus ar struchtúr na teanga agus cúram a dhéanamh den litriú.
- Ba cheart do na hiarrthóirí na haistriúcháin a scríobh go soiléir sa spás atá leagtha amach ar an leathanach.

Marcáil

- I **gCeist 1** agus i **gCeist 2** déantar measúnú ar na gnéithe seo a leanas: cruinneas gramadaí agus réimse struchtúr in úsáid, réimse foclóra, struchtúr agus leagan amach agus ábhar.
- Ní chuirfear mórán treoracha nó leideanna ar fáil chun na hiarrthóirí a threorú leis an dara ceist a chur i gcrích. Mar sin, tá tábhacht faoi leith le leagan amach an ábhair sa cheist sin.
- Maidir le **Ceist 3** bronntar marc amháin as gach botún a aimsiú. Bronntar marc eile má bhíonn an ceartú a dhéantar ar an bhotún iomlán ceart ó thaobh an litrithe agus na gramadaí de. Níor cheart do na hiarrthóirí níos mó ná 15 ceartúchán a dhéanamh. Caillfidh siad marcanna má aimsíonn siad botúin nach botúin iad in aon chor.

Féach na samplaí seo a leanas:

Sampla 1: *níos suimiúla*: ceartúchán = *suimiúla*. Iomlán ceart = 2 mharc (as an bhotún a aimsiú agus as an leagan ceart a chur ar fáil).

Sampla 2: *post múinteoireacht*: ceartúchán = *post mhúinteoireacht* = 1 marc (as an bhotún a aimsiú ach tá an ceartúchán mícheart).

Sampla 3: *inár gcónaí i...*: ceartúchán = *inár chónaí* (cailleann an t-iarrthóir seo marc amháin mar ní raibh an leagan a cheartaigh siad mícheart).

Tabhair faoi deara nach féidir le hiarrthóirí níos lú ná 0 a fháil sa cheist seo agus ní bhíonn aon tionchar ag na marcanna sa cheist seo ar na marcanna a ghnóthaíonn an t-iarrthóir sna ceisteanna eile sa rannóg seo.

- I **gCeist 4** déantar measúnú ar chruinneas gramadaí agus struchtúrtha agus ar an litriú. Is cinnte go bhfuil bealaí éagsúla ann le cuid de na habairtí a aistriú. Tabharfar aitheantas iomlán d'aon cheartleagan a chuirfidh iarrthóirí ar fáil. Ní chaillfear marcanna as mionbhotúin ar nós síneadh fada a bheith fágtha ar lár ach caillfear marcanna má bhíonn an t-iarrthóir míchúramach leis an litriú ar bhonn leanúnach.